

Vertical text in a decorative border, likely a title or chapter heading.

Main body of text, possibly a list or index, with a decorative border.

清史稿

列傳一百八十九

烏蘭泰

長 董光瑞 甲 長 邵鶴齡

鄧紹良

石 玉龍

周天受

弟 天培 天孚

饒廷選

文 瑞 彭斯舉

張玉良

魯 占 篋 劉季三

雙來

瞿騰龍

王國才

虎坤元

戴文英

烏蘭泰字遠芳滿洲正紅旗人由火器營鳥槍護軍從征回疆有功升藍翎長累擢護軍參領營總翼長軍政卓異道光二十七年擢廣東副都統善訓練講求火器咸豐元年廣西匪熾詔烏蘭泰幫辦軍務選帶適用器械及得力章京兵丁赴軍以廣東綠營精兵五百人隸之四月偕向榮秦定三等圍賊於武宣賊竄象州自請治罪詔以其初至免議命偕向榮節制鎮將時軍中將帥不和文宗憂之密諭烏蘭泰實陳勿隱上疏略曰周天爵奏向榮曲徇其子致失衆心不爲無因武宣之役秦定三周鳳岐張敬修連營防禦其堵勦不利追賊遲

延咎當同任天爵劾定三鳳岐不及敬修人心不服向榮將官傅春和春失利天爵責定三不併力後訪知實非退縮諉爲向榮推卸之言因之天爵榮定三皆有隙天爵年老直強耳輒其子光岳干預致失人心又言向榮初勦賊屢捷未免輕賊及其子招嫌楚兵籍口遂多諉卸然在軍鎮將無及榮者更易其兵仍可立功上下其疏命賽尙阿覈奏賽尙阿請不咎既往令烏蘭泰與向榮分任軍事以專責成賊踞象州中坪烏蘭泰督貴州三鎮兵由羅秀進梁山村逼近賊巢賊乘駐營未定猛撲連擊敗之殪賊千餘是年秋賊竄桂平新墟烏蘭泰分四路進攻破伏賊於莫村一日七戰皆捷斬級數千賜花翎賊屯紫荆山新墟爲山前門戶雙髻山豬仔峽爲山後要隘負隅死拒向榮偕巴清德連奪雙髻山豬仔峽合攻風門坳破之進逼新墟迭攻不下其附近村落掃蕩幾盡閏八月賊編木牌欲渡河烏蘭泰迭擊大敗之詔嘉獎加都統銜於是賊棄新墟他竄向榮等追至平南敗績賊遂陷永安州烏蘭泰追至戰於水竇圍嶺皆大捷賜黃馬褂永安地險賊皆死黨固結僅烏蘭泰一軍久戰已疲故不能制

之向榮自平南敗後被譴託病逗留梧州平樂者兩月有餘至冬始抵永安攻北路烏蘭泰攻南路毀水竇賊巢向榮亦進奪槓嶺要隘合擊迭挫賊賽尙阿親莅督戰期在必克江忠源號知兵隸烏蘭泰軍倚其贊助每言賊兇悍久蔓將不可制必聚而殲之烏蘭泰主鎖圍困賊向榮謂圍城缺一面乃古法宜縱賊出擊兩人意不合會榮克城西礮臺二年元日同詣賽尙阿賀歲賽尙阿遇榮特優烏蘭泰憤甚忠源解之然益不相能忠源以母憂辭歸時嚴詔促戰春雨連旬士卒疲困二月賊棄城冒雨夜走北犯桂林烏蘭泰率兵急追至昭平山中路險雨滑爲賊所乘敗績總兵長瑞長壽董光甲邵鶴齡死之向榮徑收州城由間道趨桂林先賊至烏蘭泰踵賊後戰於南門外爭將軍橋礮中右骹創甚退屯陽朔越二十日卒於軍烏蘭泰忠勇爲諸將冠文宗深惜之賜銀一千兩治喪予輕車都尉世職諡武壯長瑞長壽瓜爾佳氏滿洲正白旗人父塔思哈道光初官喀什噶爾幫辦大臣叛回張格爾作亂殉難予騎都尉世職長瑞襲世職授三等侍衛累擢直隸天津鎮總兵長壽以廕授藍翎侍衛累擢甘

肅涼州鎮總兵並從賽尙阿赴廣西勦匪同領湖南兵長瑞戰風門均有功新墟禦賊失利奪職留營及賊由永安出竄從烏蘭泰躡追至龍寮嶺地險左右止勿進長瑞曰軍令孰敢違者死耳勿復言以母老令長壽母相從長壽泣曰貪生忘國非孝也卒偕行值大霧賊以巨礮扼山間軍士兩日不得食爲賊衝潰踐踏死無算長壽墜馬長瑞挺矛救之身被數十創同遇害文宗以其父子兄弟皆死難深惜之並贈提督予騎都尉兼雲騎尉世職存問其母賜銀三百兩長瑞諡武壯長壽諡勤勇於永安建祠曰雙忠同死者附祀焉董光甲直隸河間人嘉慶十四年武進士授守備累擢河南河北鎮總兵從向榮攻永安奪積嶺摩天嶺天鵝嶺諸要隘追賊至昭平迭擊賊於古束龍寮嶺次黃茆嶺賊反撲力戰死之贈提督予騎都尉兼雲騎尉世職諡勇烈邵鶴齡山東招遠人嘉慶二十五年進士三等侍衛累擢湖北鄖陽鎮總兵偕長瑞等同追賊龍寮嶺隕於陣予騎都尉兼雲騎尉世職諡威確

鄧紹良字臣若湖南乾州廳人由屯弁累擢守備從勦崇陽土匪李沅發率五

百人破賊金峯嶺禽沅發擢都司賜花翎揚勇巴圖魯名號遂從向榮赴廣西
勦賊潯州牛排嶺之戰以精騎張左右翼擊兩路賊皆挫之又戰象州永安州
皆有功咸豐元年授楚雄協副將二年援桂林屯西門力戰却賊追賊入湖南
援長沙入任城守地雷發持刀屹立礮洞左臂不動殪先登賊賊退城復完軍
中稱其勇洎賊解圍竄湖北巴陵土匪晏仲武勾結肆掠紹良偕總兵阿勒經
阿勦平之三年擢安徽壽春鎮總兵詔率所部從向榮援江南廷臣多薦紹良
者尋擢江南提督榮令分剿鎮江踞賊進擊觀音山合攻瓜洲皆捷逼城而軍
賊設伏北固山下而自城突出撲營火四起官軍不能禦退守丹陽褫職議罪
仍隸向榮軍帶罪自効賊兩次窺伺東壩榮令紹良擊走之四年克太平紹良
移軍駐守又破賊采石向榮疏陳戰功爲乞免罪允之時賊由蕪湖窺徽州甯
國紹良屯黃池賊酋石國宗糾各路賊萬餘來犯紹良兵少設伏山溝多張疑
兵誘賊入痛殲之五年春賊復乘夜撲營伏槍礮俟近驟發殲賊無算詔嘉紹
良力遏賊鋒保全甚大予三品頂戴復花翎賊旣退歸復圖襲徽甯以窺浙境

紹良奉命馳往統各路援兵至則簡精銳伏要隘伺擊屢破賊克婺源黟石埭諸縣復提督銜賊聚於蕪湖窺南陵黃池紹良由灣沚進剿連破賊焚其舟遂克蕪湖授陝西提督六年春江甯賊上竄踞倉頭鎮勢甚熾向榮令紹良往督戰而諸將意不愜轉不盡力於是戰不利紹良受傷坐禡花翎德興阿軍潰揚州陷詔紹良渡江赴援幫辦江北軍務破藥王廟賊壘環攻揚州六晝夜克之又追破賊於三汊河會甯國告陷復命幫辦皖南軍務移軍赴援扼金河橋大破賊於東溪橋又迭擊賊於涇縣挫之調浙江提督賊糾黨數萬來援敗之於楊柳鋪副將周天受遇賊夏家渡戰未利紹良乘隙縱擊賊大潰遂督諸軍連奪夏家渡團山諸賊壘破七里岡賊巢進攻甯國十二月克之七年丁母憂奪情留軍紹良以甯國爲浙之屏蔽而涇縣爲咽喉要衝屯軍扼之賊屢犯不得逞旣而大軍復鎮江瓜洲急攻江甯賊圖牽掣大舉犯南陵紹良擊走之八年進屯灣沚賊合捻匪踞黃池紹良回援出賊不意大破其衆復黃池會浙江軍事日棘分兵赴援十一月賊乘虛悉馬步數萬躡而涉水斷黃池山後接應突

攻灣沚營壘總兵戴文英由江甯來援戰歿遂合圍軍中餉絀食盡紹良舉火自燔其營率親兵血戰死之事聞詔念紹良桂林長沙保城前功轉戰徽甯之間凡歷五載力竭捐軀深致憫惜贈太子少保予騎都尉兼雲騎尉世職諡忠武於殉難地方建專祠並賜其父白金四百兩子亨先候錄用尋以遺骸不得文宗尤憫之賜亨先員外郎銜後湖南巡撫駱秉章疏請附祀表忠祠允之石玉龍湖南鳳凰廳人以練勇從征隸向榮鄧紹良軍積功至游擊咸豐六年總兵秦如虎駐防涇縣以憂去代者難其人紹良薦玉龍以游擊充統將玉龍感奮遇戰益力從紹良復灣沚黃池又破賊萬級嶺累擢副將九年冬賊大舉犯涇縣迎擊於藍山嶺初勝賊至益衆圍之數重身被十餘創而殞贈總兵加提督銜諡剛介

周天受字百祿四川巴縣人咸豐初從向榮剿賊廣西轉戰湖南湖北江南積功至游擊賜號沙拉嗎依巴圖魯五年皖南軍事亟前江西巡撫張芾治徽甯兩郡防務乞援於向榮乃令天受率川兵赴援偕諸軍克婺源休甯石埭六年

援太平連破賊於花橋西溪進規涇縣大敗賊於雙坑寺復其城擢副將會休甯復爲賊踞官軍戰不利張芾檄天受助勦連捷進燬石嶺萬安街賊壘會攻休甯再復之以總兵記名七年再復婺源授福建漳州鎮總兵賊踞陵陽鎮值中秋令節夜半出不意縱火攻之盡燬賊營復破賊於祁門五里牌擣其巢禽斬甚衆八年援浙江將軍福興令守衢州天受以浙西完善地不可爲賊擾主扼樟樹潭賊竄龍游天受留軍守壘自率千人趨湯溪宣平賊引去和春疏言天受知兵能占先著而力單遣其弟天培往助之詔加提督銜督辦浙江防剿事宜天受嚴守金華令天培復武義又會江南軍復永康張芾劾其驕縱縱兵搶掠詔罷總統仍責剿賊天受方連克縉雲宣平溫州於是浙江巡撫晏端書疏陳援浙功爲白被劾之枉詔以浙事漸平命偕弟天培及總兵饒廷選等進援福建連戰皆捷復浦城而賊回竄江西復犯皖南命署湖南提督回軍防徽州節制諸軍從張芾之請也九年進軍甯國賊犯石埭太平涇縣皆遣將擊走之十年春官軍連捷於涇縣旌德賊復入浙境坐防勦不力褫勇號革職留任

時江南大營再潰軍事愈棘張芾疏言甯防將弁大半籍隸湖南皆鄧紹良舊部習氣甚深天受雖力求整頓轉滋疑謗請歸曾國藩節制國藩亦言其兵不可用別調募新軍倉猝不能至天受偕江長貴再復涇縣而賊糾大股犯甯國勢甚張天受激勵饑軍力禦旣而徽州陷餉道梗絕遣去城中居民萬餘誓以身殉八月兵敗於廟埠天受督隊守北門大雨火器不燃城陷巷戰死之詔復天受原官予騎都尉兼雲騎尉世職諡忠壯以其弟天培天孚先皆殉節命於四川省城及本縣合建專祠天培由行伍從征廣西累擢守備隸向榮軍咸豐六年從破高資蔡家窰及壩西賊壘賜號衛勇巴圖魯七年克東壩平寶堰賊巢連戰於鄔山尖山克溧水又破賊於鎮江虎頭山累擢貴州定廣協副將克瓜洲以總兵記名八年授雲南鶴麗鎮總兵先後偕張國樑破賊秣陵關及江甯南門外功皆最和春知其善戰令赴浙江援其兄天受迭克武義龍泉追賊入閩克浦城會江南北軍事急天培回援九年春賊分六路攻浦口張國樑督諸軍禦戰天培首先躍馬衝陣各軍乘之殲賊無算賊築壘於雙陽蕭家圩別

由九湫洲出悍衆來撲天培分兵擊之三戰三捷功出諸將上擢湖北提督遂駐防浦口是年冬匪首陳玉成糾衆十餘萬犯江浦天培乘其初至痛殲之既而賊虜集後路爲所抄襲裹創血戰力竭陣亡優詔賜卹贈太子少保予騎都尉兼雲騎尉世職諡武壯天孚從兄天受軍轉戰以功洊保參將留江蘇補用咸豐九年賊犯皖南副將石玉龍戰死涇縣南山嶺天孚屯灣沚馳百里往援要擊於章家渡大破之由是以驍勇名尋援金壇會諸軍連戰解其圍十年江甯大營潰閏三月賊首李世賢大舉復圍金壇天孚偕總兵蕭知音參將艾得勝知縣李淮同守之淮素得人心兵民合力屢却賊時江南軍事大壞孤城援絕天孚馳書兄天受始疏聞屢詔促鎮江副都統巴棟阿偕總兵馮子材赴援卒不至凡守百四十餘日糧盡軍無固志知音等願率兵民突圍走鎮江淮不可誓死守乃中止屢獲賊內應斬之城陷先一日偵知將有變竟夜登陴至旦分半隊休息值大霧叛兵遽起先戕天孚賊乃梯登知音得勝突圍出淮死之事聞贈天孚總兵予騎都尉世職諡威毅

饒廷選字枚臣福建侯官人以行伍游升千總道光中從剿臺灣有功擢守備從水師提督竇振彪出洋禽海盜擢章州營都司遷游擊治匪無株連得民心咸豐三年奉檄赴詔安治械鬪而潮州會匪襲漳州伏兵於城中突起鎮道皆遇害廷選聞變間道馳還號召鄉民千餘城民應之賊遁旋復大至廷選率鄉團固守迭戰破賊禽賊首謝厚等遂署漳州鎮總兵外剿內撫期年始平總督王懿德薦其才可大用四年授貴州安義鎮總兵留署福建陸路提督五年粵匪陷廣信浙江戒嚴廷選赴援扼衢州尋楚軍克廣信賊知浙境有備走徽州六年賊酋楊輔清復圖廣信以擾浙廣信兵僅數百知府沈葆楨馳書告急廷選方駐甲玉山曰賊得廣信則玉山不守而浙危矣值大雨水漲駛舟急行抵廣信賊已至城西太平橋初諜城中無兵及見旌旗賊爲奪氣廷選所部僅千餘人屢出奇擊賊旣而賊大至部將畢廷邦賴高翔皆勇敢獻計曰今賊不知我虛實以我能戰後路必有大兵若稍退賊追我且立盡當速決死戰廷選用其言明日開城奮擊自晨至日暮毀其長圍軍聲大振越二日賊引去賜號西

林巴圖魯閩浙大吏與江西督防者不嫌檄廷選速回師保浙廷選待接防兵至始行廣信民感其義七年調衢州鎮總兵會皖軍克婺源八年賊首石達開大舉犯浙廷選分軍援廣豐自守衢州賊驟至穴地攻城城圯者三皆擊却之守七十餘日巡撫晏端書劾其久未解圍又失江山常山開化三縣奪職未幾圍解三縣皆復授南贛鎮總兵王懿德檄召回援閩境以病未行遽劾革職留營八年會克連城龍巖仍補南贛鎮曾國藩奏以代沈葆楨守廣信從民望也十年粵匪復犯浙廷選赴援復淳安擢浙江提督十一年秋攻克嚴州進規浦江賊大至不敵退保諸暨而杭州被圍急巡撫王有齡促回援廷選舊部僅漳勇數百楚軍二千事急收集江南潰卒皆不任戰徒激忠義勉以當賊賊於城外海潮寺鳳凰山爲堅壁隔絕內外困守七十餘日糧盡士卒饑餓十一月城陷巷戰死之贈太子少保予騎都尉兼雲騎尉世職諡果壯入祀昭忠祠於杭州建專祠兄廷杰弟廷夔同戰死附祀焉旣而曾國藩沈葆楨以廷選守廣信功奏請建祠廣信以副將畢定邦賴高翔附祀文瑞克什克特恩氏蒙古鑲藍

旗人荊州駐防由饒騎校從軍轉戰湖北安徽累擢江西撫標中軍參將咸豐十年赴援浙江克餘杭以總兵記名解湖州圍賜號唐木濟特依巴圖魯授處州鎮總兵進剿金華賊圍浦江文瑞嬰城固守屢出奇破賊營逾月乃陷詔免其處分回援杭州入城助守城陷死之予騎都尉兼雲騎尉世職諡果毅彭思舉湖南平江人以團練剿賊從李元度爲平江軍營官戰湖口東鄉貴溪安仁玉山積功晉秩知府元度罷去留所部五營隸斯舉始獨將一軍會攻景德鎮饒廷選見而器之調援浙江破賊於淳安復其城擢道員留浙補用駐守千秋關賊大至搏戰竟日潰圍出移防海甯會攻嚴州下之進援廣信而所部留駐常山者索餉譁潰斯舉率親兵赴杭州乞解軍事回籍巡撫王有齡留管營務處斯舉建議省城米糧來自甯紹錢塘江距城三里當築甬道兵護之運道乃無虞未及行而賊至城中竟以絕糧陷斯舉分守湧金門死之

張玉良字璧田四川巴縣人咸豐初由行伍從征廣西積功至千總四年從向榮至江南戰江甯城外屢有功累擢永州左營游擊六年敗賊於丹陽金壇賜

號黽勇巴圖魯又敗賊於溧水西門燬其礮臺擢處州營參將七年克句容加總兵銜擢三江口協副將破鎮江援賊於江濱克鎮江叙功以總兵記名八年大破江甯援賊擢甘肅巴里坤總兵攻太平金川諸門賊衆突出痛殲之馳援溧水毀紅藍埠賊壘克其城斬賊千餘級加提督銜九月會攻浦口大捷而九洲之賊來援玉良率後隊截擊賊大潰十年春遂乘勝克九洲詔遇提督缺出題奏尋調肅州鎮總兵江南大營諸將善戰者向榮舊部多蜀將張國樑所部多粵將蜀將以虎坤元爲首周天培及玉良次之時浙江軍事亟議分軍赴援咸屬望於張國樑而圍攻江甯功在垂成國樑爲全軍所繫不克行坤元天培已前歿乃命玉良總統援浙諸軍專辦浙江軍務未至而杭州陷將軍瑞昌獨堅守駐防內城與賊相持玉良率六百人馳至出賊不意燬武林錢塘諸門外賊壘梯城而上遂復杭州捷聞詔嘉爲奇功賜黃馬褂予騎都尉世職擢廣西提督賊之擾浙也原以牽制江南軍故見玉良至則不戰遽去由廣德分路趨江甯總督何桂清駐常州檄玉良回援而賊別隊已侵江甯大營後路桂

清留玉良於常州以自衛未幾江甯兵潰張國樑和春先後殉詔玉良代節制其軍常州陷禦賊於無錫高橋賊由間道出九龍山襲無錫玉良前後受敵退保蘇州入城計守禦未定潰兵應賊蘇州亦陷玉良奔杭州褫職隸瑞昌軍瑞昌令規復嚴州繼克常山復原官十一年復遂安而嚴州又陷玉良自江南敗衄後兵心已渙不能復振賊再攻杭州馳援軍不用命自知事不可爲戰杭州城下軋身臨前敵力鬪中飛礮歿於軍贈太子少保子騎都尉兼雲騎尉世職祀本籍昭忠祠諡忠壯魯占鼇四川成都人由行伍官平番營守備從向榮剿賊廣西江南繼從吉爾杭阿克上海攻鎮江戰皆力累擢川北鎮總兵調建昌鎮蘇州陷爲賊所執罵賊被鬻割死之贈提督銜子騎都尉兼雲騎尉世職劉季三廣西武宣人以武舉從右江道張敬修戰桂林全州授左江鎮標守備從向榮至江南積功至副將賜號直勇巴圖魯咸豐八年大兵攻秣陵關季三於葛塘寺設伏出賊不意斬關入火之又破六郎橋賊巢功皆最擢直隸通永鎮總兵十年張國樑督諸軍攻江甯季三任上關一路壽德州守賊秦禮國獻壘